

## **AKTA KERAJAAN TEMPATAN 1976**

### **UNDANG – UNDANG KECIL PELESENAN TEMPAT LETAK KERETA PERSENDIRIAN (MAJLIS PERBANDARAN TAIPING) 1987**

PADA menjalankan kuasa – kuasa yang diberi di bawah seksyen 102 Akta Kerajaan Tempatan, 1976, Majlis Perbandaran Taiping membuat dan menurut seksyen 103 Akta tersebut, Pihak Berkuasa Negeri mengesahkan undang – undang kecil berikut:

1. Undang-undang kecil ini boleh dinamakan Undang-Undang Kecil Pelesenan Tempat Letak Kereta Persendirian (Majlis Perbandaran Taiping) 1987 dan hendaklah dipakai bagi Majlis Perbandaran Taiping.

2. Dalam undang-undang kecil ini, melainkan jika konteks ayatnya menghendaki makna yang lain-

“lot letak kereta” ertinya ruang yang ditandakan di tempat meletak kereta untuk meletak satu kenderaan motor;

“orang” termasuklah sesuatu syarikat atau badan berkanun atau persatuan atau Kumpulan orang yang diperbadankan atau tidak diperbadankan;

“tempat letak kereta persendirian” ertinya mana-mana tanah atau premis atau sebahagian daripadanya yang dimiliki atau diduduki oleh mana-mana orang selain daripada Majlis Perbandaran Taiping atau Kerajaan dan digunakan untuk meletakkan dua puluh buah kenderaan motor atau lebih, dan di mana orang awam dibenarkan meletak apa-apa kenderaan tertakluk kepada bayaran fee sama ada bagi setiap jam atau selainnya;

“Yang Dipertua” ertinya Yang Dipertua Majlis Perbandaran Taiping.

3. Tiada seseorang boleh mengendalikan suatu tempat letak kereta persendirian melainkan jika ia memiliki lesen yang sah yang diberikan bagi maksud itu di bawah undang-undang kecil ini.

4. (1) Fee yang kena dibayar untuk mendapatkan atau membaharui lesen hendaklah seperti yang dinyatakan dalam Jadual:

(2) Sesuatu lesen melainkan digantung atau dibatalkan terlebih dahulu hendaklah terus berkuat kuasa sehingga 31hb Disember berikutan tarikh kuatkuasa lesen itu dan boleh dibaharui pada atau sebelum tarikh habis tempohnya.

5. Pemberian sesuatu lesen hendaklah mengikut budibicara Yang Dipertua.

6. Permohonan untuk mendapatkan sesuatu lesen untuk mengendalikan suatu tempat letak kereta persendirian hendaklah dibuat secara bertulis kepada Yang Dipertua dalam borang yang ditetapkan oleh Yang Dipertua beserta dengan pendua pelan menunjukkan tempat, susunan letak kereta, ukuran dan muatan tempat letak kereta itu.

7. (1) Tiap-tiap pemegang lesen hendaklah menjaga tempat letak kereta persendiriannya supaya dalam keadaan bersih setiap masa;

(2) Tiap-tiap pemegang lesen hendaklah mengadakan bekas sampah yang cukup di tempat letak kereta persendiriannya.

8. Pemegang lesen tidak boleh menambah atau mengurangkan jumlah lot letak kereta dalam lingkungan tempat letak kereta persendiriannya kecuali dengan kelulusan bertulis Yang Dipertua terlebih dahulu.

9. Pemegang lesen hendaklah mengambil langkah yang cukup untuk menjamin bahawa tiada kenderaan diletakkan mengikut apa-apa cara yang boleh menghalang pergerakan lalulintas yang sempurna di dalam atau di sekitar tempat letak kereta persendiriannya.

10. Pemegang lesen hendaklah tidak mengguna atau membenarkan digunakan mana-mana bahagian tempat letak kereta persendiriannya bagi apa-apa maksud lain selain daripada untuk meletak kenderaan motor kecuali dengan kelulusan bertulis Yang Dipertua terlebih dahulu.

11. Pemegang lesen hendaklah mengadakan pencahayaan yang cukup, dan jika tempat letak kereta persendirian itu bertutup, ganti udara yang cukup di tempat letak kereta persendiriannya hingga memuaskan hati Yang Dipertua.

12. Pemegang lesen hendaklah mematuhi segala arahan yang diberi oleh Yang Dipertua dan pihak polis untuk memastikan bahawa keselamatan yang cukup diadakan di tempat letak kenderaan persendiriannya.

13. Pemegang lesen hendaklah memastikan-

(a) bahawa kelengkapan menentang kebakaran yang cukup dipasang hingga memuaskan hati Yang Dipertua;

(b) bahawa tangga dan jalan keluar dikendalikan dengan sempurna;

(c) bahawa semua tangga, laluan, pelantar dan jalan keluar bebas dari segala halangan; dan

(d) bahawa tiap-tiap pintu dibina dan dipasang-sedemikian cara supaya dapat dibuka dengan senang;

di tempat letak kereta persendiriannya.

14. Yang Dipertua, mana-mana pegawai yang diberi kuasa olehnya atau pihak polis boleh pada bila-bila masa memasuki mana-mana tanah atau premis bagi maksud menentukan sama ada-

(a) tanah atau premis itu sedang digunakan sebagai tempat letak kereta persendirian tanpa lesen yang sah yang diberi berkenaan dengannya; atau

(b) suatu kesalahan di bawah undang-undang kecil ini telah dilakukan.

15. Yang Dipertua boleh mengecualikan mana-mana orang atau golongan atau kategori orang daripada kesemua atau mana-mana peruntukan-peruntukan undang-undang kecil ini atau mengenyahkan mana-mana atau kesemua syarat-syarat undang-undang kecil ini atau menggantikan mana-mana atau kesemua syarat-syarat ini sebagaimana yang ia fikir patut.

16. Seseorang yang melanggar mana-mana peruntukan undang-undang kecil ini adalah bersalah atas suatu kesalahan dan boleh, apabila disabitkan, dikenakan denda tidak lebih daripada dua ribu ringgit dan denda selanjutnya tidak lebih daripada dua ratus ringgit bagi tiap-tiap hari kesalahan itu berterusan selepas disabitkan.

**JADUAL**  
**(Undang-undang Kecil 4 (1))**  
**FEE LESEN TAHUNAN**

Bil lot tempat letak kereta bagi satu tempat letak kereta	Fee kena dibayar (\$)
20-50	100
51-100	150
101-200	300
201-300	500
Bil lot tempat letak kereta bagi satu tempat letak kereta	Fee kena dibayar (\$)
301-400	750.00
401-500	900.00
501- ke atas	1,200.00

Diperbuat pada 27hb Februari 1986.

[M.P.T. PEN/10/2SJ 21 PU, PK. 23/75 BHG IV]

MOHD KHAIRAN BIN ABDULLAH,  
Yang Dipertua,  
Majlis Perbandaran Taiping

Disahkan pada 22hb Oktober 1986.

MUHAMMAD FADZIL BIN KHALID,  
Setiausaha,  
Majlis Mesyuarat Kerajaan, Perak.